



र 5/

तुबारि

www.pangi.in

अब अंग्रेजी, हिन्दी त
पंगवाड़ी भाषा अन्तर असी।

Issue 78; 01/09/2018

बिषय सूची

| | |
|----------------|---|
| नेरेन बलाए कथा | 1 |
| केहु के कथा | 2 |
| सच्चा प्यार | 3 |
| कविता-जिन्दगी | 4 |
| लातोणि धाम | 4 |
| खास वचन | 4 |

नेरेन बलाए कथा

ए एक मोटा पुरुषा थीआ, जे कि घणें झोंट बणांताथ। किस कि तेस तती तागत थी। एक रोजे बोक भो, बोले की कुफे ठाकुरे फुलयाटुड़ अगर अपु घरे छत देणे करो थी। तेन से न धामा। तेस कोई पता लगा से चिन्त्याहार धे किएउ जे थिया। तेस लग गा पता से तेठिया हेरी बटा। जिखेई से कालेउ खां जे गे त से बीर आ दे तेन दार कान किया दे बिच चा अन्तर डुबा। त अपफ हालमे बच नियोक बिशा। जिखेई से गी कियां ए, त ठाकुर पता लग गा कि तेसेरी कम भो। तेन तेस जे हक दिती त बोलु 'मोंउ केयां गलती भोई गई। मेई तोउ जे धाम न करी। में भाई, तु जेठी बी असा भी निस।'



त से भी निसा त तोउं ठाकुरे से अपु गी नीयां। त तेसे धे रोठी-धोठी दिती। तेन कोई दश जेई रोठी खेई। से तेस हेर नराज भो थिआ। तेसे जे भेणी थी, तेन्ही से हउ छेड़ा त तोउं तेन हउ खाउ। तेन तेन्ही भे छेड़ाई छड़ी। तेन्ही दुबारी तेस जोई केदी हसाइ ना किया। तेस कियां बाद से तेठीया गा। तेस जे बोलु कि 'मित्रा मोउं जे एक दार होरा आण।' तोउं तेन तेठीया झोटू बान्ठी घण निया। तेन महलीत तकुर से हात हेरा नाउ कि मेई की आणो असु। तेन तेखेई तेठी पुआणी पी जे से भी छेड़ा त तेन हेरु की तेन झोटु नेई आणो, तेन त घण आणहो असु। तेन हेरु अब त



मेई ए आणी छओ असा, त तेन से फाट पुठ रगड़ा दे, झोटे ई बणाई छेड़ा। त तेस केयां बाद से तेठीया शेदुएण गा त तेन तेठी एक हाड़ी कटी त एकेले से ठाकुरे गी पुजाई। से खुश भोई गा कि ऐन त में दश मेहणु के कम एकेले करु। तेन ठाकुर जे बोलु की 'तुस इठी घर ना बणा। तुस होर जगही घर बणा।' तेस केयां बाद फिलयेटुड़ जे धेजी एसी, तेठी तेन से दार डुबाई छेड़े। तेन बोलु 'तुस आज कियां बाद इस जगाही केदी घर ना बणाई सकते। तेन तेठि धोड़े थच बणा।

विनोद कुमार, मो. न. 9459828290

अस सोब तुबारि टिमे

बाड़े 23 अगस्त, तिएस जे गड़ी झड़ो थी, तथ अन्तर जे मेहणु मरो थिए, तेन्के आत्मा जे शान्ति मगते, त



तेन्के गीहे बाड़ि जे बि प्रार्थना कते। कि से सोब सुसुर लौते।

लेहु दान करे

लेहु दान करण चाहिए किस कि तेसे बोलि अस त सुसर रहेंते, पर केसे होरी बि कम ऐंतु। एसे बोलि केसे होरि जीवन मेता त कि तुसि माडु लगतु ना ? टेम-टेम बठ तुस सोभ अपु लेहु होरी दे दिया करे जेसे बोलि तुस स्वास्थ रहेते, त होरि जीवन मेता।



तुबारि पत्रिके अन्तर छपो सोबी लेख, त कथा अन्तर भुओ विचार सिर्फ लेखके भो। तुबारि पत्रिके एसे कोई जिम्मेबारी नेई। तुबारि पत्रिका सिर्फ भाषा सुहलियत करण जे एक मंच देण लगो असी।



धाणि त तसे जुएली

केआं अब सते बंटी अठ फेरे लवाण चाहिए। सत फेरे तेन्के व्याहे, आठुं जे फेरा असा, से कुई जे लवाण चाहिए कि से कुई बचांते त तेस



केहु के कथा


हैं पांगेई अतु अब्बल असु कि जेसे कि कोई बोक नेई। हैं पांगेई हर यक ग्रां यक किछ न किछ बोक त पक्की असी जीं यक बोक तुसी आज हुनाणे केहु के कथा शुणांता। ए बड़ी पुराणी बोक भो। हुनाण अन्तर बहारा बीहो हुनाण भुइया कतुथ। से कवास हिंगरुएश मुहुरी कियां हुनाण भटोरी तकर थी। तोउं त आज तकर बी यके राग असे त हैं कवास टजे कोई बी मेहणु आज तकर बी हुनाणे जाठी घियाल त तेस बी पुरे चाउ चार करण एंते त तेस बी शेण लांते।

यक बड़ी पुराणी बोक तुसी जे लाण लगो असा कि जे केहु थिए। से बोड़े ताने-माने त शगती बाड़े थिए। से उडरतेथ बी। तेंके घर हुनाण भाटोस थिए। तेस जगाही नाउ 'केहु कारण' असु। तेठी तेंके पुअणी बी असु। तेस पेणी यक बोक बोता। तेन पेण बड़ राकस मेहणु के मुनी धुंता। आज बी चेले मेहणु से ढ्याणी बठ केतु कि टुंटा राकस तेठी मुनी धुंता। तुसी बी एस बोकी पुरा पाता भोला। कोउं बोते हैं पांगेई राकस नेई? पर ए हैं पागल बोक असी कि से नेई। पर में हसाब जोई त असे, किस कि बस्ते हर साल बोते कि आज रेकुस जमते त से अगर धुपी तिएस जमे त से फुकी घेंते। मेगे तिएस जमते त बी फुकी घेंते। जे अगर मेहेण मेग रीहा त से न मरते त से पुरी साले फसल नी छंते। किस कि तेस साल किछ बी फर बरगत ना भुंती। फसल से पुरी फुकी घेंती या त पकीण बकत मेगे बोली खराब भोई घेंती। केसे साल हुनाणे पार ढेसे कोश बि मेहणु काओ असे त से बोल देंते की एउंशू खास फसल ना भुंती। केसे केसे बहेरी त मेहणु भेरदीएणू धे राकसे खुरे नशण बी मेता। से 5, 6 हात लंमा भुंता। से की केसरी मेहणु खुरे नशण थोड़ी ना भो। से त राकसे खुरे नशाण भुंता।

यक बोक बोता तुसी जे बोडी पुराणी जिखेई केहु थीए, से उडरतेथ। से रेई धे बी सउ वार पुजु, जे उडार दी कइ घेंतेथ त तेठीया फिर बार पुज कइ दुबारी फी उडरी कइ एंतेथ। यक फेरी तेन्ही हुनाणे अन्तर रामेशी 8 भणुआटी राती राकस रात भई उलटी शेण ला त यक दुई फेरी राकसे जुएली तेस हक देण जे आए, पर से कोठीया शुणताथ। से त केहु शेण लाओ थिया। भ्यागे पथवारी टेम तेखेई से मारी गा। वो बचारे कोईए जंग बठ तुरघोड़ झड़ा दे तेसे जंघी बी टुटी गई। त से अपु धाणि हक देण जे आई त से बी मर गओ थिआ। त तेन राकसणी केहु जे बोलु कि 'तुसी त में धाणि मार छा, अब में कुआ कोउं पाइता?' तेखेई केहु तेस वर दिता कि ऐस 3 रोज बाच त तेखेई केहु तेठिया यक जाओरा उमा लिडिया त से तेठिया जोहु कइ 3, 4 कि0 मी0 दुर से उमा झड़ा त हुनेणु जे बोलु 'आज कियां बाद तुसी भणुआट तेठी करी। तेस कियां बाद आज तकर बी हुनाणे मेहणु भणुआट तसे जगाही बठ कते।

आज तकर बी से राकस उगरी शारवाटी नोउ फुलयाट 8 भणुवाटी से बाच खुलती त तेस 3 दखेणे हुनाणे टाठीइ तेस बानता। से केघेली बेश ऐंता त तेस से बन छंते। पर से एन्ही टोहोई तिहारी अपु खर्च नेंता। हुनाण केहु के कारण तेंके घर बी असा। तेठी पंतु तेंके पुआणी बी असु त तेठी आज तकर बी राकस मेहणु के मुनी धुंता त तेठेकण पुआणी बोते पहेला लाल भुंतुथ त तेठी से दुधे त केसर वहार देंतेथ। तोउं जाई कोई तेठे कण तेस पोण पींतेथ। आज त भला अब मेहणु केसे बी न मनते त राकसी त भूत प्रेत कोटि मनण लगे?

तेंकेरी यक युद्धे बारे बतांता अउं। यक टेमी बोक भो की हैं हुनाण जिखेई केहु थिए त तेखेकण बोक भो ए। गनारी भुटोरी यक मेहणु हैं हुनाण धार आ त से हुनाण भटोरी बिशा। त तेन यक भोटली जोई लाच बेनी गा त से पांच छया महेन हुनाणे रेही गा। पता यक रोज तेस अपु गिहे चेता एण लगा त से अपु चुरी हेरण लगा त तेसे 6 चुर थी। तेस बिचा यक चुरी नेओथ जे कि सुआ दुध देंतीथ। तेन हुनेणु जे गिए दिती त से अपु गी जे नाश गा। त तेन गी अपु जुएली जे बोलु 'तेन्ही हुनेणू में यक चुरी छापी नियो असी त तु खाड़े चणां त अउं राए फोज धामी ऐंता।' तेसे जुएली से समझा। से बोड़ा भारी बदमाश थिया। तेन अपु जुएली यक न मानी। तेस कियां पता से राए राजे के गा त तेन तेस जे बोलु से तियारी गा त से तेठीया नाटे त जिखेई से रंथ बठ जे पुजे त केहु पता लग गा। त से उडीर कइ भटोरी पुजे त तेन्ही टेशी जे हक दी कइ बोलु कि राए फोज त कुन जंघाल जे ऐई गओ असी। हउ बी उगी बिश्ता ना हुनेणू खेणेरी दे त से नाठ त से सोबी हुनेणू खेड़ेरता। तेस टेम थिए हुनाण कियां कवास हिंगरवाशी मुहुरी तकर सोभ यके टज। त से नाठे त भेरनी पाधर भारी राए फोज थी।



तोउं केहु बोलु कि अगर ए बज गे त अस जीत घेंते। अगर ना बजे त अस हार घेंते। केहु या ढेदुड़ा मंगणट लेहु भरु दे दिता उडार। तेन पुटे कियां लेहुए बड़ से भरे त राए राजे मगर दुटका दे। केहु यके दुती दे राजे मगर बठ कानी बड़ तेसे मगर कियां ये कान जाई धरती अन्तर घेई गई त तोउं तेंके सोब सेना बी मरी त तेस कियां बाद बोले कि टेशीये खरु खोटु 12 बीयो हुनाण केनी ना भेनीतुं?

केहु यक टेम करेस कियां कानी बाही त बही त टमनु कुण यक गगर बीनी त तेठिया टकोस लोबी बठ तेस कियां पता टुनुरु चोउर तेठी। तेठी केहु के जाक थीया। तेन्ही अपु ताणवारी हुनाण फाट डुबाई छेई। आज तकर बी से तेठी केती मेहेणु बोते कि तेन्ही अपु गभुरु बी अपु ई उडरणे बाड़े बणा लाओ थिए। तेन्ही अपु गभुरु के धे उडरणे मंत्र त दिते। पर पोउणे मंत्र देण भुल गे। यक रोज बस्ते टेम बोते, से दुओ गभुरु बग जन देण जे लगे दे से नाठे तेन्ही दुओई तहाणे जंघाली कियां उडार दिता दे। से जां त कोठी नाठे। उडीरी कइ पता तेन्ही याद आई की गभुरु को गे। तेन्ही याद आई की तेन्ही अपु गभुरु उडरणे मंत्र त दुतो असे पर पोउणे मंत्र नेई दुतो। तेखेई तेन्ही मंत्री कइ अपु गभुरु भी कढ़े त से मारो थिए। से दुहो रोलुण लगे कि असी कि कइ छउ? हैं बेलि अंपु गभुरु मरी गे।

विनोद कुमार

सच्चा प्यार



यक कुआ यक कुई जुओई सुआ प्यार कताथ। से बि तेस कुआ जुओई सुआ प्यार कतीथ। पर तेस कुई ई बोज तेस कुआ पसंद ना कतेथ, किस कि तेस कुआ बोक करणे कोई ढंग ना थिया। कुआ समझी गा त से कुआ तेस कुई केई गा त तेस जे बोलु, “मोउं पता असा, कि तें ई बोज मोउं पसंद किस ना कते। पर अब अउं सुधीर घेन्ता।” कुई खुश भोई गई त तेन तेस कुआ जे बोलु “में ई बोज जुओई बोक करा।” कुआ कुई ई बोज केई गा त तेन्हि जुओई वादा किया कि से सुधीर कइ खरा मेहणु बण घेन्ता। कोईए त कुई ईए बोजए रजामंदी जुओई तेन्हि

दुहि के पलम पी छइ, त दुहि यक होरी आँगोठि लवाई छड़ी। तोउं से कुआ बाहरी देश जे घेई गा, अगर पढुण जे। तधोरिया से रोज के तेस कुई जे फोन कता रेहंताथ।

यक रोज से कुई त तसे ई बोज घुमण जे गो थिए त गी जे वापस एणे टेम यक गाड़ी बेलि तेन्के एकसीडेंट भोई गा। चरे ई तेस कुई टीर खुले त तेन हेरु कि तसे ई बोज ती लियरी देण लगो असे। तेन्हि सुआ चइग लगो थी। से कुई किछ करण चहंतीथ, पर तेस बि सुआ लगो थी। तोउं मेहणु से हस्पताइ पुजए। तठि तेन्के ईलाज भुआ। पर डॉक्टरे तेस कुई ई बोज जे बोलु “तू कुई आवाज घेई गो असी, ए अब कदी बोल ना सकती।” से कुई इ शुण कई सुआ डर गई। तोउं तसे ईए बोजए से हस्पताइ केआं गी अहणती। तेस कोईए रोज रोज फोन ऐंतेथ, पर तेन कुई कदी तसे फोन ना उठा। से कुई तेस कुआ दुखी करण ना चहंतीथ। तेन कुई तेस कुआ जे चिटटी लिखी “मोउं भुल गा। अउं अब तोउ जुओई प्यार ना कती।” तेन कुई चिटटी जुओई पलमी आँगोठि बि वापस लंघाई छड़ी। से कुई सुआ दुखी बिशण लगी त दन रात रोलती रेहंतीथ। तेस कुई ई बोज सोचुण लगे कि अगर अस इस जगाई छइ दी कइ कोठि होर जगाई जे घेई घियुं त शायद हैं कुई तेस कुआ बिसरी घिएल। ई सोच कइ तेन्हि अपु घर बेची छइ त से होर जगाई जे घेई गो। तठि से कुई हथ भाषि शिचण लगी त से झठ हथ भाषी शिच गई। से कुई रोज अपु ईया बोज जे हथ भेषि कर कइ बोतीथ “मेई से कुआ भुलाई छइ।”

सुआ रोजे बाद तेस कोईए दोस्त तेस कुई केई आ त तेस जे बोलु कि से तोउ जुओई मीण चहंता। तेन कुई यक कागज पुठ लिख कइ तेस कोईए दोस्त जे बोलु “तेस कुआ जे ना बताण कि अउं कोठि असी त अब अउं किछ बोल ना सकती।” इस बोक पुठ तेस कोईए दोस्त तठिया घेई गा। 2-3 साले बाद तेस कोईए दोस्त हथ अन्तर यक कार्ड आण्ह कइ तेस कुई गी आ। तेन तेस कुई धे कार्ड दी कइ बोलु, “से अब ब्याह करण लगो असा।” तेन कुई दुखी मन जुओई से कार्ड खोला त हेरु कि दुल्हने जगाई तसे अपु नउ लिखो थियु। तेन कुई पतू हेरु त से कुआ बि तठि खाखइ बिशो थिया। तेन कोईए तेस जे हथ भाषी कर कइ समझाउ “एन्हि 2-3 साली अन्तर मेई बि सिर्फ हथ भाषी शिचि। तोउं त एण चरे लगु। अब जी तू बोती तिहांणी अउं बि बोता।” इ शुण कइ तेस कुई टीरे बइ आँखू एइ गो त दौड़ दी कइ तेस कोईए कियाड़ी शची। तोउं तेन्हि दुहिए ब्याह कइ छड़े।



त ए ट्यारेओ! जे होरी जोई प्यार कता से तेन्हि धीरज त दहा-दया जुए धरान्ता। से तेस हेर न जइता। से अपु तारिफ अपफ न कता, होर न से घमण्ड कर कइ फुलता। से होरी जोई बुरा बर्ताब न कता। होर न से सिर्फ अपु भलाई बारे सोचता। से बोक बोक पुठ लेहर न कइता। जे कोउं तसे बुरु कते, से तेन्हि केआं बदला नेणे बारे ना सोचता। से होरी के बुरे-बुरे कम हेर कइ खुश न भुन्ता, बल्कि तेन्के सच्चाई त खरे कम हेर कइ खुश भुन्ता। से हमेशा सीढ़ता। से हर हालत अन्तर तस पुठ विश्वास कता। से कदी हिम्मत ना हारता त हमेशा धीरज रखता। तोउं त, जे मेहणु होरी जोई प्यार कता, से कदी न हारता। भविष्य वाणी करीण त अनजाणे भाषा बोलीण शयद कदी न कदी खतम भोई घेन्तु। होर भगवाने बारे जे ज्ञान-बुद्धि असी से बि कदी न कदी शठे घेई घेन्ति। पर प्यार ई असा जे हमेशा रेहंता।

जिन्दगी

षममा सिंह



भो की ए जिन्दगी?

बस घड़ी, दुई घड़ी मेहमान,

छड़ देण एन्ता सोबी,

इस धरती धन मान।

दे भाई कमाण, जेतु तोड केआं पुगती

पर याद रख कि बेधर्म कमाई सोब जाई घेन्ति।

मौते सम्हाणि भला कोउं टिग बटो असा ना?

ना भुआ से सिकंदर, होर ना भुआ कोई महात्मा।

सोबी यक रोज छड़ देण भुन्ति अपु जिन,

धिक सोचिया करे भाई, कोठि लो असा, तेई अपु दिला।

धारे फियुडु ई भो, मनखे जिन्दगी,

केतु अब्बल फुलो असी आज,

टड़ी घेन्ति शुई।

दुई घड़ी ई जिन्दगी अन्तर

मनखे केतु विचार?

सोच रखे तुसी, की कइ करण अपु जिन्दगी साकार।



ना किढ रोभ, समझ कइ कि 'ई में भो अपु',

इठिया घेन्त-पेन्त केनि बि कुछ नी ना बटु।

जेतु रोज जीण असु तोड, जीण दिए पूरे मन लाई कइ,

पर याद रखे देणे एन्ता हसाब, इठिआ घेई कइ।

जात पाते त धरमे वैरभाव छड़ दे, ए मनखा

किस कि मतोक अन्तर अपणेरी देन्ते, धोखा।

प्रेम त भाईचारा बणाण दिए, अपु लक्ष,

नफरत त बुराई केईआं, दूर तु घेई विश।

लातोणी धाम ।

जेखेई हें पांगेई सोब फसल लुणी घेंती त सोब मेहणु एक होरी छेड़ते कि आज तुं लातोन असी। जेंके लुणणे मुकतु तेस गीए जिल्हेणु होरी जिल्हेणु तेस दन धाम देंती, जें जें तेंके लुणण भुंती। तेन्ही जे अराक, मासु, बगेरा बगेरा बड़ाते। ए रीत रवाज हें पचलान कियां चलो असी। त ए असी पुरु जुग-जुग चलां असी। किस कि ए हें पांगेई रवाज भो। एस अस कदी मरुं न देंते।

तुबारि मासिक पत्रिका

◆अस इ उम्मिद करुं लगे असे कि एण बाड़े रोज अन्तर सुआ मेहणु इस कम अन्तर साथोट देन्ते।

◆इस तुबारि मासिक पत्रिका समाचार पत्र एकट अन्तर रिजिट्रि नेई भो। सिर्फ पांगी घाटि अन्तर पढुं जे त भाषाई सुहलियत करण जे इ पत्रिका शुरु किओ असी।

◆तुबारि यक अवाणिज्यिक पत्रिका भो।

◆तुबारि पत्रिका कोई मेहणु, जनजाति, त संस्कृति गलती कढेण जे नेई छपाण लगे। अगर कोई ई सोचता बि त अस जिम्मेबार नेई।

◆छपाणे पेहे सोभ आर्टिकल दुई टाई पांगेई मेहणु हरालो असे। इ त खुली बोक असी कि पेहलि बार पांगवाड़ि लिखणे सुआ मुशकिल भुन्ति त गलती बि भुन्ति। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।

◆आर्टिकल्स ना मिले, या घाटि मेहणु के साथोट ना मिले त तुबारि पत्रिका कदी बि बंद भुई सकती।

◆कोई चीज छपां असी या नेई छपां जे तुबारि संपादकीय टीम पुरा अधिकार असा।

◆अस किलाड केन्द्रीय पुस्तकालय, त बजार हरिराम लाले दुकान अन्तर तुबारि झॉप बॉक्स पुठ बि अपु सझाव ओर आर्टिकल्स रखुं जे सुविधा किओ असी।

◆अस सोबी पांगी मेहणु जे हात जोड़ कइ अनुरोध कते कि, तुस बि कोई अछा आर्टिकल, पुराणि या नोई कथा, कहावत, कविता, त नोई घीत (पागवाड़ी अन्तर) लिख कइ छपां जे हेंघे दिए।

तुबारि संपादकीय टीम

☎ 9418429574

☎ 9418329200

☎ 9418411199

☎ 9418904168

☎ 9459828290



खास वचन

- आशा ई लौती जे तुसी अपु मंजिल तकरी नी सकियेल, त मंजिल ई लौती जे तुसी जिन्दगी जीण शिचालियेल, जिन्दगी ई लौती जे रिश्तेदारी कदर करण शिचालियेल, त रिश्तेदारी ई लौती कि जे हर रोज याद करण जे मजबूर भोई घियेल।



- शब्द ई चीज असे जेसे बड़ाई जुओई इन्सान या त दिल अन्तर बसता या दिल केईया बाहरी निस घेन्ता।

- भले मेहणु के संगती बेलिए हमेशा भलाई मेती, किस कि ब्यार जपल फियुडु बीच बड़ घेन्ति त से बि खुशबूदार भोई घेन्ती।